



## KENYATAAN MEDIA

### PELAKSANAAN KAJIAN PERLINDUNGAN KESELAMATAN SOSIAL RAKYAT MALAYSIA BEKERJA DI LUAR NEGARA (SINGAPURA)

**Putrajaya, 11 Januari 2022 – Kementerian Sumber Manusia** melalui **Pertubuhan Keselamatan Sosial (PERKESO)** dengan kerjasama **Institut Maklumat dan Analisis Pasaran Buruh (ILMIA), Jabatan Perangkaan Malaysia** akan melaksanakan Kajian Perlindungan Keselamatan Sosial Rakyat Malaysia Bekerja Di Luar Negara 2022. Kajian awal ini akan memfokuskan kepada rakyat Malaysia yang bekerja di Singapura.

Dalam usaha untuk membina jaringan keselamatan sosial yang lebih komprehensif, kajian ini bermatlamat untuk membina profil ekosistem, mengumpul maklumat dan mengenalpasti keperluan rakyat Malaysia yang bekerja di Singapura. Di samping itu, kajian akan turut meneliti secara holistik isu-isu penting lain yang berkaitan agar tindakan susulan yang bersesuaian dapat dicadangkan bagi menambahbaik jaringan perlindungan keselamatan sosial untuk rakyat Malaysia yang bekerja di luar negara umumnya.

Dianggarkan seramai 150,000 rakyat Malaysia berulang-alik secara harian ke Singapura untuk bekerja sebelum pandemik COVID-19 melanda akan terlibat dalam kajian ini. Daripada jumlah tersebut, dianggarkan 90,000 rakyat Malaysia masih berada dan bekerja di Singapura sepanjang tempoh 2021.

Sasaran responden bagi soal selidik ini adalah individu yang menepati kriteria berikut:

- I. Rakyat Malaysia yang berada di Singapura samada bekerja, tidak bekerja atau bagi tujuan lain;
- II. Rakyat Malaysia yang bekerja di Singapura tetapi sedang berada di Malaysia; dan
- III. Rakyat Malaysia yang pernah bekerja di Singapura pada tahun 2020 hingga 2022.

Sehubungan itu, kerjasama daripada individu-individu yang menepati kriteria di atas adalah dimohon untuk berkongsi input mereka melalui soal selidik yang dilaksanakan secara dalam talian. Penyertaan mereka yang menepati kriteria-kriteria yang digariskan amat penting dalam memastikan maklumat yang dikumpul adalah tepat dan dapat digunapakai untuk menentukan hala tuju serta tindakan seterusnya. Dapatan kajian ini amat penting dalam usaha memastikan kualiti dan persekitaran kerja bagi rakyat Malaysia yang bekerja di luar negara dapat dinaiktaraf sekaligus membuka peluang kepada lebih ramai rakyat Malaysia mendapat pendedahan dan pengalaman bekerja di luar negara disamping memperolehi pendapatan yang lebih baik.

Soal selidik kajian boleh diakses dengan melayari pautan <https://myworkabroad.perkeso.gov.my> mulai 10 Januari 2022 sehingga 28 Februari 2022. Bagi sebarang pertanyaan, sila emel ke [myworkabroad@perkeso.gov.my](mailto:myworkabroad@perkeso.gov.my) untuk penjelasan lanjut.

**KEMENTERIAN SUMBER MANUSIA  
JABATAN PERANGKAAN MALAYSIA  
PUTRAJAYA  
11 JANUARI 2022**